

四庫全書

集部

欽定四庫全書

集部

方是閒居士小稿卷下

詳校官庶吉士臣瑚圖禮

主事臣呂雲棟覆勘

總校官庶吉士臣朱鈐

校對官庶吉士臣吳裕德

謄錄監生臣丁瑞麟

欽定四庫全書

方是閒居士小稿卷下

宋 劉學箕 撰

木犀賦

并序

避世之士邀其光而弗耀卷其道而弗售雖不  
知於人弗遇於世澹泊沖和怡樂四時初何蘄  
於人之知世之遇哉然一經品題足以遺芳後  
代是山林巖谷所不能終汨沒其身而無所表

暴於世也草木之生也亦然蓋所謂知於人遇  
於世者亦有幸不幸時不時之嘆木犀為花高  
雅出類馨發而不淫清揚而不媚有隱君子之  
德婉之籬菊江梅雖不同調而同其情其五柳  
孤山之朋儕乎然見於楚詞之後世或未賦之  
至如牡丹桃花橘柚槐柳抑何所長而皆著之  
賦頌獨於此花絕未有發幽光而出潛德者豈  
闕典歟為作數語以廣之其詞曰

對西風之搖落慘灝氣於素商憫百草之殄瘁驚木犀  
之吐香綠葉扶疎高枝蟠虬潤沐乎曉烟夕露清颺乎  
皓月明秋崇岡之崕小山之幽黃英燦然宛其靚修可  
援可攀可處可遊儼商山之隱士邈未可以晤語左揖  
手兮素娥右拍肩兮青女青女兮拭妝素娥兮照袂散  
十里之清芬揚郁烈而不媚茲葢與菊英兮齊驅並梅  
花於伯季者也彼春風穠華非不繇嘉爛然紅紫燦若  
朝霞嗟美麗之過眼等委氣於泥沙惟此叢生惟有深

致獨抱明哲遠屏聲利託根雲林絕跡朝市飽三秋之  
風霜復優游以卒歲韜葉底之輕明類有德者之避世  
迨夫冰雪沍寒晚節彌厲雖零落於山樊之間蒼苔之  
上有騷人雅士申之以無數之歌亦既見止不忍遐棄  
收其朽腊暇日而爇之明窓淨几猶足返其魂而續其  
遺味也耶

畫壁賦

方士李畫松竹梅蘭山石於南堂之照壁方是

閒主人見而賦之其詞曰

彼方外之士兮能卓犖而不羣登吾南堂兮運乎中書  
之君心役手兮倏然前陳枝與條兮生意若神染墨寫  
真兮豪釐莫差其形松老而壽兮歷世故之舊兮竹清  
而瘦兮中立而不疚兮梅偃蹇而橫枝兮吐歲寒之芳  
姿蘭滋芳於水涯兮美不斲人之知介於石兮黜而醜  
兮合四花兮成五文兮客至顧瞻心齋咨兮忽清風之  
來兮儼芳馨之紛披過日華之西兮亂雲影之參差聊

延佇以終晷兮燃髯鬚而吟思方其火雲張去聲空裊暑

金液散髮舒嘯氣息吁吸面之以揚清泠挹之而傲泉

石及其遐想玄陸霰雪交集北風呼號萬木凍立吾不

知松竹梅蘭之為畫耶意其真是而相錯乎山之隙也

余曰噫嘻世固有之萬物變幻予奚不思彼林林總總

之衆兮與之形質而不卑小大之齊人不可得而推之

兮又烏能妙結而全窺惟天地造物之巧兮有非人力

之所能為今摹狀而傳真兮乃工於畫筆之所移是人



力足以奪造化之權而造物者果不勝人力之巧思者  
耶且夫瀛洲之僊兮名昭於前兮千古不泯兮託筆墨  
以傳兮凌烟之像兮勲業相望兮顏範具瞻兮炳丹青  
以狀兮此其是耶色非丹腹抑猶非耶宛其林壑理固  
弘深言求博約客惟唯唯俯不見答畫耶真耶一笑而  
作

昔蔡公孚有偃松賦王公曾有矮松賦學算得老  
松狀如倚蓋因作倚松賦

嘉定紀年丁丑維歲就盈日月壬子之未仡然三夫呀  
吸來詣戴負古松結蒼疊翠回翔婉婉跛倚靚毅寔彼  
庭隅屏植清閼迺相與莞爾一笑歛襟揚袂而言曰此  
木衍迤非杉非檜涉歷春秋疇話代世生於括蒼之深  
山老於人跡所不到之地斷嵯嶢嶢矗壁厲厲猿猱愁  
其嶮巖鼯狖畏其鈇銳跂而望之心乎愛矣迺因採  
藥謀發雅計於是壑萬丈以闢頰綆千尋之縋繫志惕  
神驚汗流浹背是斲是鋤於寶於衛亦既得之忘餐失

寐不遠乎千里之程貿然而來來蓋將以遺夫人之好事也方是閒主人喜而受之與之金而食乎稻飲乎酒而肉以晁分命長鬚易茗以斛沐以靈泉植以壤沃遷卑堂所娛翫不足循除而睨之盤旋以撫之又賦之於辭曰夫何挺特之操兮託根崕岷雲深路奧兮晦迹韞匱隱淪之抱道兮潛伏彌奇羞側足以躅翫兮寒往暑來幾何年兮時移事易幾推遷兮期守故節久彌堅兮癯橋山澤泯無傳兮吁嗟若人貪婪之深兮移根紅

塵不保其清兮命之不偶籍之萌為利之心兮吾將陳  
之不能究其情之所由以闕也且夫孤高之姿挺特之  
質驗之於今考之在昔大夫之封處士之節歲寒不凋  
霜沍逾潔直聳雲烟淨延風月或擬之森森或對之烈  
烈或取樂一丘或邀榮雙闕或然以讀書或掉以陳說  
茲殆以人而見諸又烏識堅剛之奇絕者哉其有美之  
為讚詠之於辭著之成賦取之於詩影搖千尺青貫四  
時既食其實又啖其脂且愛其聲復憐其姿亦騷人雅

士之有感寓之意而不能忘其私也嗚呼地產珍材天  
毓粹嫩高不數尺大僅盈軌翩翩惟蓋之傾卓卓車輪  
之倚亭亭巖谷之秀楚楚山林之偉乃今磐互夫軒楹  
超越乎煙水一根立兮雙幹輪囷百修蕃兮萬枝紛委  
皮鱗鱗兮幡蒼虬鬣針針兮團刺蝟飛鳳兮來儀回鸞  
兮翔跼風吟兮春濤鳴空日射兮雲影覆地連蜷兮森  
瑤瑛婆娑兮擁幢旒此實目之所未覩亦人之競託  
以為異也嗟夫名稱百木之長用為一世之奇烟阮陂

陟雲嶺委蛇合抱昂空何地無之旦旦而伐力不知疲  
舟車所求棟梁是資此蓋以其材而適於用知於人而  
遇於時今汝以跼蹐僂僂蚘虬離披世不汝醜反頌汝  
奇似子不才山樊水湄終焉允臧謙以自卑永畀天年  
相與遊嬉斧斤何戕塵鞅何縻迺其幸歟抑又何悲

中秋翫月記

中秋翫月古今所同者也雖古今所同然故實所始騷  
人雅士不多見於載籍後世未嘗無遺恨焉惟唐四門

助教歐陽公貞元十二年與邵楚長林蘊陳詡客長安  
邨中修厥翫事賦詩叙景曲盡其妙且謂月之為翫冬  
則繁霜太寒夏則蒸雲蔽月雲蔽月霜侵人蔽與侵俱  
害乎翫秋之於時後夏先冬八月之於秋季始孟終十  
五於夜又月之中稽於天道則寒暑均取於月數則蟾  
兔圓况埃壙不流太空悠悠芳菲裊徊桂華上浮升東  
林入西樓肌骨與之疏涼神魂與之清冷斯古人所以  
為翫也每一讀之未嘗不捲卷三復其說古今同翫是

月獨歐陽公情思宛曲形容詳盡不出此數十語是古  
今翫者幾何人而播傳於後者止見於是序何翫之多  
多而筆之鮮鮮也辛未月夕予與猶子康廟庾庾席飲  
於屏山故廬之北溪集賓友劉中友直孫溶柯君衡江  
漢吳澤浩歌持白盡宵而罷夜漏既深溪光搖蕩表裏  
澄澈仰視霄漢無纖雲之留俯顏清影若明鑑之燭雖  
平生夢寐蓬萊廣寒之遊疑不是若也况復露氣清潤  
巖桂馥郁穠浸肌骨幽情無奈其翫雖與昔人是同而



清香溢琰筭霑襟袖不知長安之翫有是乎方其長安  
之翫有瑣瑣之悲故鄉之念尊酒千里恨不同風今諸  
公與予無在客之憂懷土之痛唱而和勸而酬優游夷  
愉樂縱其極吾又料昔人之翫必無是也已而復自念  
言人生悲樂之不常天宇陰晴之靡定後之中秋如吾  
之十二人者果能無悲歡聚散以復集於此乎籍曰同  
之天宇高高果能無陰晴之變乎蟾兔光滿果能常皎  
皎如斯夕乎天時人事是未可期也臨文嗟悼政古人

所以常興感愴之歎吾曹其獨能愬然於懷而無所繫於心哉既而尊傾月落坐客霑醉友直請余記其事余揖客以歸命章子執燭援筆書其顛末為來歲故事是  
不可不記

一枝堂壁記

劉氏一枝堂太子太保公元豐三年所營也建炎初燬於兵火淳熙二年伯父忠肅公嗣建於潭溪祖居規模甫就弗克興創而薨我先君七者翁不忘先志九年乃

重建於翠壁之下翁歿諸兄遊宦四方復頽廢於十六  
年廢後又二十八年元孫學箕再建於南山溪上一枝  
益取莊周鷦鷯深林之義事具先君記文中嗚呼惟我  
高祖及我先人作述之意有不可揜者在昔我祖以文  
章器業聞於四方以經術為先師學者至數百千人傳  
道解惑凡五上春官不合而歸築室屏居養親適懷示  
無當世榮望意不枉其進而恬其退高風凜然猶可想  
見我先人承累世焜耀之澤傳德行道藝之懿登進仕

路致君澤民何往不濟廼甘退處奉祠於家抱道以致  
嗚呼是固有過人者矣且天下之所慕者富貴耳天下  
之所不屑為者隱約耳今也捨人之所慕而從人之所  
不屑為是不有大過人者其孰能與於此哉古者固有  
遜千乘之國辭卿相之位而不為高耕寬閒之野釣寂  
寞之濱而不為怨二者榮悴雖不同其為憂樂亦有異  
使遂樂富貴而悲貧賤希勢利而忘隱淪其立志也為  
矯其潛處也為偽進退出處兩非其道吾知其必不然

也不然則豈不謂之遭有時達有命歟雖然命固懸乎  
天身固遭乎時大丈夫不識保身庶遜之明哲高偉洞  
澈之機鑒安命俟時以樂其心將使後世疑其得一而  
失一也惟知命者不然世之言曰根大者枝必茂膏沃  
者明必熾遺於彼而得於此嗇於身而昌於後不在其  
身必在其子孫此又理之顯然者天地昭著福善禍淫  
若數計符合若燭照龜卜無少差舛吾家自五季末來  
居此鄉逮今十二世矣田園粗供伏臘二百餘年祖孫

相承不替其業詩書足以傳家父詔兄命守而無違圭  
組軒裳接聯於世一枝之安抑可謂得其所安矣且此  
堂之建由我宮保公而下太師忠顯公興焉秉節不屈  
光照千古少傅秘閣屏山先生三公繼焉勲業道德載  
在方冊忠肅公又繼焉立朝行已為時名臣所謂根之  
茂者其實遂膏之沃者其光瞻豈虛語哉我先人經之  
營之歷年滋淺故未有發潛德而繼前躅者予小子不  
敏何足以當之惟不敢遺先美不敢墜厥緒茲營南山

新居復建此堂且祠我宮保公及我先人於其中庸見  
命堂之意以致其景仰之思抑所謂不在其身而在其  
子孫者當勉之諸子不肖亦不敢不自勉飭祠成因志  
於壁以告我後人嘉定八年臘月十有八日元孫學箕  
記

### 寓室記

始予讀莊周禦寇書謂人有生直一世之寓耳故其以  
存為附贅懸疣以死為潰癰決疣忘肝膽遺耳目視世

之富貴利達流行坎止而遊乎天地之一氣聽其自逝  
信其所止曷嘗繫憂愉於心哉嘗反復其說固知大塊  
載之以形勞之以生佚之以老息之以死是為一世之  
寓而不知其所以真寓者何如也比壯東西南北區區  
而之秦僕僕而適楚乃稍曉解其理逮夫更歷滋多事  
情益熟然後真識寓之所以為寓也故嘗為之說曰使  
人心安於所寓縱流離困苦視世之變遷若不釋然者  
凡志慮所接皆為勝境矣使人心不能安汝所止雖日



享高堂邃館以華其居媯娥鍾鼎以悅其意吾知其弗  
以為樂而祇益動安土重遷之歎爾予以嘉定癸酉中  
秋抵安康館於漢東書院屋宇靚深梅竹茂密前通州  
治之東廳接以過廊後有堂甚閎壯榜以平心左史劉  
公某所書也堂側即書院所環列明窻爽潔特甚後架  
廊以接厨廡前創亭以趨東廳後廡周回繚曲不類官  
廨若東西王侯第宅而又不與有治相混雜益舊史君  
家侯某所營也凡予游息日徜徉其間明年秋九月始

劈竹為疎櫺就障後廡為小室方圓不過尋丈琴書堆案畫圖張壁若坐廣廈若居高明以之室處以之御冬蓋深知為寓之樂矣因自念言萬物賦形宇宙間小大飛走蠢然何知有知且靈者惟人爾夫以蠢類無知之物若蜂之牖於房螳之國於垤蛛之都於簷螟蛉之室於壁一不完其居適其性知整葺焉孰謂靈者反不若蠢者之有能乎哉故予感其事述寓言因榜曰寓室一日客至坐甫定莞爾而笑曰子形甚偉子志甚大卷其

才而弗施抱其道而弗售今跼蹐於斗大之地以傲  
睨一世自謂得於所寓吾見其隘爾未見其大也予曰  
是固然矣抑不知予之所謂大而寓者將以鴻荒太極  
為寓耶以汗漫六合為寓耶以丈夫四方之志而安事  
一室耶抑亦為人生去來之無常而不必以泥其跡也  
且予來為寓公安此寓室可謂幸會况家山在念歸興  
浩蕩一日揚舲東下此室存之與否所不能知而予偉  
形大志固自若也子何哂焉使後之同志者見葺而新

之必曰斯人也處小而志不卑存大而用不迂其安於義命者矣安於福分者矣苟或撤而去之滅蹤削跡又豈其數也歟豈其寓也歟子為我言之客不能對既出追其語以記之子月十有八日寓室主人記

菖蒲記

蒲為品不一生谿礪者謂之蓀植池沼者謂之蒲皆麤壯豐碩恐韓子所謂昌陽者是也惟煙嵯雲谷間自有  
一種葉森而細瘠而堅脊若劍狀若髮丰茸蓬鬱根脉

盤錯一寸十餘節本草謂久服輕身延年益心智可入藥者疑此也余前年經廬阜過洞口見居人貨山石奇甚意可種此以助小軒幽雅至南康適遇賣者提携傍余舟扶疎綠淨可愛可翫以金易二十斛以歸然尚恨蒲肥不與石稱雖不若蓀之偉亦未至髮之細今夏物色數本修矗若綠絲森峭若霜劍真奇秀也未幾僧志瑛又將其禪房所養者為寄清波漪漪白石齒齒瑛於石之前後植為首尾蹲伏偃蹠宛類卧貌余寘之衆斛

之中以冠其首其餘高下有次環列坐隅乃易其斛而記之河北青瓷盆者一福唐壽山石為斛者二劍津玳瑁石為盆者三番陽白瓷方斛者四龍泉碧青盆者一崇安紺色花鼓者十有六南康舊烏瓦缶者八合計二十四盆斛嗚呼亦可以為富矣余嘗為作讚賦詩云茸其髮劍其脊露葉凝泉雲根絡石英英塵俗之表濯濯丰神之特稜稜林壑之秀戢戢澗溪之質茲蓋飽九秋之烟霏擅千巘之叢碧者也詩云沙石一杯水憐渠長

養勤几間生谷岫座上得烟雲九節蒼龍瘠千莖綠髮  
紛山房窻牖淨閒澹我同君又云掬水仍盛露晨窻日  
日看為渠黃葉剪如我白鬚刪龍蟄盤根古蠶冰瘦節  
寒杜門無俗客幽事政相關然余疇昔無所嗜好少日  
有書畫之癖中年酷愛書籍適日乃玩意於菖蒲此皆  
幽人逸士之常態較之留意他物豈不萬萬相遼遠哉  
昔人之有愛石者愛琴者愛山水者愛菊愛蓮者愛竹  
愛梅者其標致品格如何則余之愛書畫愛典籍愛菖

蒲亦猶是耳是未可以為冗長唯今竹窻松几朝吟暮  
坐列數百軸畫對數千卷書羅數十斛菖蒲時開一軸  
時讀一卷意倦則徙倚伸欠於菖蒲之間亦足以樂此  
生矣朋舊過臨能同此樂則清心宴坐坐至於忘言可  
也不能呼樵青煮茶茶罷揖之使去云嘉定十年五月  
十有六日種春子劉學箕記

紫芝頌

并序

辛未歲七月某日予於故廬之前見有執紫芝



而過者就觀焉繼求其餘焉人曰此公祖瑩之所產者盡以授予予得之喜甚即往省諸墳瑩山之上下皆芝也一莖一葉者有之一莖九葉十葉而成房者有之其莖若漆之瑩其葉則紫而淨槁而不枯榮而不華扣之而有聲携之而歸人之疑信者相半予之自信則不疑也然芝也不種於人不恒有於世人雖遇之孰知其為芝乎林者吾知其為木葉者吾知其為竹松栢

蓬蒿蕭艾吾知其為松栢蓬蒿蕭艾惟芝也不  
可知不可知則其謂之非芝也亦可矣雖然芝  
之生必有禎祥昌其後芝為端世物也芝之果  
不為禎祥也夫世之疑者不足恠也恠其弗識  
也識則無所疑矣余感其事故為之頌

維芝雋潔兮非眷之力兮毓無種裔兮是為芝之德兮  
維芝敷生兮非人之耘兮特見挺出兮是為芝之神兮  
惟芝繇茂兮靡候耕耨兮抽蔚擢秀兮是為芝之壽兮

維芝突萌兮固守其貞兮槁而實腴兮是為芝之靈兮  
適山而採之雲根連野兮拔不滯茹兮伊人之取捨兮  
採之盈筐兮人莫知己兮吾其與爾兮自信而不恥兮

長生頌

壽吳  
太尉

猗歟吳侯肅振貔貅克壯其猷丹桂黃華壁月綺霞秋  
今益佳初度剛辰維嶽降神生甫及申英烈磅礴淘氣節  
鏗鉉文武並更剪除姦兇紹復疆封績用彌隆帝悉忠  
勤委寄專城民事詳明頌聲洋洋課最孔彰燕寢凝香

外間持權倚重三邊號令整嚴烽燧宵沉鼓鈺晝清元  
戎治成凡厥所難弊流多端革不憚煩是割是懲既安  
且寧綱維舉行勲在王廷澤在生民天上麒麟麻宣制  
除詔驛在塗齋壇紫樞鳴鼉奏璫胙土分茅壽極崧高  
福昌子孫鼎彝石存功崇位尊山魏川流八千春秋與  
國同休

止酒頌

并序

嘉定三年余寓止南徐與三山陳惟定遊每邂逅

近次上而江山寺觀下而市樓客邸必相與論  
詩論詩未嘗不醉歲暮余將歸閩惟定連夕過  
余徘徊淒惻不忍遽別一日惟定容色慘戚若  
有不自釋然者口若有說而未宣

闕

語而

復囁嚅覺其意切而情甚專也予感其心請其  
言惟定乃舉首揚眉揜腕掀髯旁引曲喻舉後  
證前蓋謂予之多飲勉予節止之是先繼念予  
獨力以當世事復相憫終鮮之無兼予深感夫

意之蹇諤荷其眷之勤拳念別去之經歲徒負  
負以未悛豈無他人情吐肺肝酒食徵逐孰能  
告焉念益友之警誨誠藥石之鍼砭今而後兮  
惕厲敬佩服以勉旃

厥初生民求全真淳麴米回春緩酌輕歌衰顏紅酡毓  
養天和後世肆忽爛腸腐脇縱情敗德溢以池澠相以  
肉林忘國殞身彼髡自累一石致醉徒多為貴逮夫劉  
伶五斗解醒曷若獨醒竹林謂賢羣飲謂僊淪胥忘年

白也興發醉狂莫遏采石捉月皇天無親禍福在人沉  
酒是懲靖節達理日泰厥旨斷以真止予何人斯倒壺  
闕平聲卮不覺其迷銘紳書盤持戒靜專期無負朋友之  
言

節酒銘

并序

方是閒居士心固好客以多飲廢事而又獨力  
既為頌以止之朋舊之來訪者不能飲茶即退  
必為開樽每執琖客獨飲居士以立戒辭客意

甚不樂飲雖醉情頗不減

音含

往往不察居士心

遂以為孤介傲物然居士之赴親舊之招者亦

復以止為請坐是取詞速譴不獲已間輟或破

戒累累杯勺不知一杯復一杯也且惡居士之

執德不回反極其飲顛頗過量有甚於未戒之

初徒視所頌為虛文而不能必其止也因自念

言與其沉湎以敗德喪生不若真止之為愈與

其獲諄於交友朋舊孰若絕交之是

闕

又自



為之說曰止酒既獲罪於人絕交尤獲罪於人  
止酒且不可況於絕交乎止與絕二者誠介傲  
事世所不可行者孰謂居士之倜儻而可行乎  
哉今酌以中道取斷於心每遇把杯不得踰三  
爵庶幾釋交遊之議而有以全居士之生其或  
不亮而終困之是又不近人之情也其可乎節  
酒之銘於是乎作

嗚呼噫噦狂藥之害生兮彼儀狄之不仁兮戕天下後

世之人兮嗚呼噫噉世競飲之莫知其非子不爾思將  
殘其體肢頌焉止之曷不守之流連沉迷覆蹈前軌崇  
飲貪杯謂畏親友之譏君子愛人以德兮獨不堅其懇  
辭辭而弗獲兮胡不節而省之心之匪石兮人將亮之  
藉弗能亮兮豈人之情兮亮而弗悛兮子將復奚為願  
凡今而後兮毋絕人之好兮去訑訑之色兮黽勉而從  
之從容中道兮不越乎三厄兢兢惟念兮勿弛乎操持  
申孫武之令兮斷斷乎無違子其違之兮是誠小人之

歸

瘞鶴銘

并序

甲子歲自都梁携二鶴歸戊辰冬斃其所獨  
存者悲唳不食引吭長鳴若失侶者每竊悲之  
乙亥歲予遊安康於故人任叔厚寧復得一隻  
間關水陸由漢渚下大江轉番陽凡六千里而  
後至家涉歷山川與予相從不為不久翔舞清  
唳霜清月曉助予雅致不為不多在彼有得朋

之懽於吾遂閒居之適可謂得其所矣丙子七月十八日為僕陳七戕其亢而殞其一丁丑正月十九日又為練十游蕩致饑餓而并絕其二予悲念惡劇情所不勝雖撻之逐之不足以償僊禽之非命而釋予之憤懣也既作詩以悼念復作銘以瘞之

嗚呼鶴之壽不知其紀兮千六百年鸞鳳同止兮引茲員吭抗纖趾兮感彼簫聲舞清徵兮回翔金穴鍾秀美

兮蕙帳蘭巖怨何以兮胡不一舉飛千里兮乃隨穆王  
化君子兮厄於僮奴命枉死兮氣填胸臆彈厥指兮豈  
非尸解離塵澤兮假託世緣歸弱水兮縞衣玄裳棄敝  
屣兮九皋從茲掩雙耳兮終不劈琴薦羞也兮幣裹纁  
黃塋山岵兮世無還丹不復起兮作銘見情於以誄兮  
為方外陳敬叟題墨序

楮郡平章德懋九封之錫黑松使者精騰萬歲之呼未  
多祖氏之雄誇豈俾張金之獨步惟方外士實人中英

粵收異方於此酷好既絳人託宗盟之舊與石侯堅雲  
水之交鹿角螺丸精見喻麋犀紋玉質妙超易水惟是  
久淪二頃不樂

音見  
毛詩

一貧藏廬阜之十年膠乎安在製

天峰之一劑法亦徒然欲効葛僊翁賣薪之為恐有王  
方翼致富之譙是皆俗子小見烏識達人大觀必有指  
廩捐金助之掃煤點漆固難俟磨休王斲髓以書佛語  
豈弗遇金溪子針魚以寫離騷石室觀書載美文嵩之  
有傳東齋注易更求曹植之吟篇聊憑序文覲遇知者

謹序

送畫士張道人序

侔揣萬類揮翰染素雖畫家一藝然眸子無鑒裁之精  
心胸有塵俗之氣縱極工妙而鄙野村陋不逃明眼是  
徒窮思盡心適足以資世之話靶不若不畫之為愈今  
觀昔之人以一藝彰彰自表於世皆文人才士非以人  
物山川佛象鬼神著則以樓觀花竹翎毛走獸顯蓋未  
有獨任一見而得萬物之情兼備諸體而擅衆作之美

雖張僧繇吳道子間立本諸公不能之况萬萬不及此者自謂能之可乎古之所謂畫士皆一時名勝涵泳經史見識高明襟度灑落望之飄然知其有蓬萊道山之丰俊故其發為毫墨意象蕭爽使人寶玩不寘今之畫士祇人役耳視古之人又萬萬不啻也亦有迫於口體之不充俛就世俗之所強問之能彼乎曰能之能此乎曰能之及其吮筆運思茫昧失措鮮不刻為成鵠畫虎類狗其視古人神奇精妙每不逮之所以若然者未可



悉尤之畫工畫工雖志在阿堵而亦有不專在夫阿堵也道人張生畫虎探三昧摹寫形狀蹲踞出伏橫行安尾不下色貴父子世以張畫虎目之遠來訪予留半歲為予作虎圖花木翎數十軸綽有奇趣予嘗為攷之自唐迄今名流固多而張其姓者獨不少如僧繇詢南本騰贊景思質圖玫元昉翼戲經璪素卿道陵者得十有七人出於神僊出於大夫士俱非庸俗輩工佛像者有之翎毛者有之風林水石者又有之皆曲盡奧妙表

表傳於今今張生豈其遠裔歟不然何其多能仍兼其伎也一日辭去求詩於予予病酒不暇作特序畫之以然而送之繼為之說曰夫畫之多品均是藝也鮮有精其能焉蓋有精於此而粗於彼得其偏而遺其全今子遂并有之殆造化者私於子矣然未審子之致精措慮果有合於前古無粗彼遺全之譏而一唱三歎果得意外不傳神彩飛動之旨不乎今予所得者畫爾神聖工妙則有世之鑒別者在予不得而知也子姑行挾是

以養身助道不患人之不我知若猶未能皆偶也予其遲之母怨皇宋嘉定丁丑重陽後十日序

耕隱上梁文

屈信進退人生孰不求其安榮寤寐歎歌賢者乃欲退而窮處緊先廬南山之下得隙地西麓之隅姑從隱淪以事耕鑿方是閒居士家傳儒業身服聖言語彼世紛全茲天性功名浪語嗟壯志之未酬軒紱儻來念此日之足惜雖袖山林之手不忘畎畝之忠春雨鳴蓑負耒

耜錢鑄之器寒烟濕履滋稻梁黍稷之苗植杖或耘或  
耔荷蕢且疆且理矧在昔之君子猶下同於堊夫卧南  
陽廬耕有莘野以樂堯舜之道以誦周孔之書不以獨  
善而肆厥身終期兼濟以行其志識其大遯世無悶非  
斯人將誰與歸久慕前修今希遺蹟况有青山遶屋更  
疏綠水循除樹牆下以桑已辦一區之宅種渭川之竹  
未饒千戶之侯修棟初扶微情是述

東襪襍牛衣曬曉紅伊呂不逢湯武聖等閒閒

却兩翁翁

西春水秧鉞綠葉齊不見昌黎垂訓戒起身公  
相自鋤犁

南稼穡秋成已作甘斗酒東臯相勞苦盈疇吹  
動碧盤髮

北伊欲服田須力穡情農自安不作勞困塵胡  
取禾三百

上山疊雲屏開畫障梁鴻逸去人不知冀缺耨

時妻為饗

下擲比黃雲歲多稼小臣憂國願年豐勿闕饑

凶待高價

伏願上梁之後人安盤谷詩詠輞川鬼神呵禁不祥龜  
筮協從廸吉雞豚蕃息虎豹遁潛倉積坻京繭肥甕盜  
式謹三時之務請言四體之勤落日長鑱草軟牛羊之  
夕西風短笠波平鴻鴈之秋多釀榨頭春以延方外士

五峰新居上梁文

竊以還山弄明月厭城市之囂塵會圃臨清風擅林塘  
之雅趣昔聞妙語今得賞音方是閒居士志本歸田心  
非傲世惟迺祖迺父嘗求志以隱居豈為子為孫敢謀  
身於利達念自幼艱苦每操孤孺之心而稍壯益艱恥  
徇鍥澆之俗半生浪走三徑殆荒一壑獨專五峯擢秀  
左列清湖之嶂右栽白石之津後遶方池前縈長坂平  
林遠岫氣象何啻千里煙翠浮嵐曉夕為之萬態望人  
村之掩靄占田野之寬閒卜築告成拋梁是頌

東衣冠與世同在家常蚤起憂國願年豐

杜

西時訪武陵溪畏人尋卜築徧性合幽棲

杜

南局束我何堪自昔愛幽賞今茲得縱貪

蘇

北石壁橫翠色漾揖怕驚鷗來竿待魚食

李

上此樂清且放入峽喜巉巖出峽愛平曠

李

下千篇陵鮑謝尊酒樂餘春棋局消長夏

蘇

伏願上梁之後金穰富溢玉燭陽明時和歲豐家給人足詩禮與盟之士詭譎潛銷里閭同社之人春秋逸豫



樂朝廷之有道幸門館之無私租稅蚤輸任縣官之督  
迫役徭不到承先澤之庇庥得為天民生此王國謹因  
考室備述斯文

功德疏

代外  
舅作

天佑昌時朝生賢將桂花方盛得秋氣之正中菊蕊初  
開覺涼颼之倏至皆以致椿松之祝敢輒修科錄之緣  
伏願某官茂對休成永同宴喜九五福曰壽膺俾昌俾  
熾之祥八千歲為春伸善頌善禱之祝

宴吳侯致語

代外  
舅作

天朗氣清過重陽之五日地靈人傑生昭代之元戎式  
啓華筵用伸善頌某官賦姿剛毅蘊識疏通六韜三略  
之討論源流深遠三令五申之詳審號召嚴明粵從仗  
鉞以來備見折衝之效山西勁氣天孕精神塞北飛塵  
夜沉烽燧過中秋而甫經月瑞當世而屆佳辰三壽作  
朋百祿是荷不俟酒罌之恥亟膺樞筦之登某猥以賤  
工逢茲勝事敢陳口號上奉清歡

一昨初登大將壇  
弓刀旗幟簇雕鞍  
連營壯士心先服  
並塞邊人膽已寒  
天上麒麟祥可卜  
人間日月老應難  
明年樞府為公壽  
慷慨還知酒量寬

李福佺化度牒疏

剪巫山兩段之雲  
休勞夢想從天空  
三乘之教  
悉意皈依  
比丘尼久矣  
灰心護身符尚難入手  
若成剋草公案  
必有捐金檀那  
庶幾念慮持戒於朝斯夕斯  
或使愚蒙結緣於聞者見者  
既脫舞裙歌扇  
俾親經卷藥爐  
思則

有歸福豈無報

三果說

前年經紀故園臺榭亭池一無存者先君子手植惟梅  
梨櫻三木而已剝蝕於風露斧斤於樵牧肌理朽蠹憔悴  
橫道人多勸伐之余持三不可之說曰三果少而花  
花而實人咸美之今其老瘠不充人之口不悅人之目  
子欲伐之乎是不可者一也且物之生也由少而壯由  
壯而老由老而衰理之常也子不記其少壯乃幸其衰

朽而伐之乎是不可者二也以歲月考之種在予之未  
生今先君下世三十三年予亦年四十矣視之諸兄行  
輩今父兄不可見見此果歎手澤之存焉憫孤形之煢  
然遐想典型宛其在是予欲伐之是不可者三也客不  
能對相與拉淚芟剪枯槁剔除遠揚培養愛護便覺生  
意發越是冬依然著花春子滿枝予與向之言者摘其  
實飲其下而俱有感焉自爾勿剪勿拜尚可期保晚歲  
又奚止於斯也哉因為之說

金鯉說

凡人居第有水有竹而後為勝故予築室地方三十畝  
流泉五脉室旁鑿池水居其半竹木半之二屋宇亭館  
又二之一池種魚鯉鱣鯪鯽鯽鯽隨地之宜者放之客  
有以金鯉二十尾為饌者予目之奇甚曰此何自而來  
哉曩客中都十年見貴戚豪右搜網此魚為佳玩每尾  
不下數千錢何不往獻以求其贏今暗投於荒山之濱  
拙亦甚矣客不顧縱之池而去明年春明波暖風酣日

霽浮湛下上若黃鸝之穿楊金梭之織組其美無與方  
者久之不見游泳策杖尋究園丁笑為言曰疇昔飛鷺  
雪立驅逐不驚是必為之捕食矣予曰嘻是固以奇以  
色而自受其斃者也鱸鯽貴白鮎鰾貴青魚之正色也  
故其沉潛容與去來莫測禽鳥亦未易肆其觜喙金鯉  
尚黃色燦金物生反常暴眩太甚人猶愛之况鷺禽乎  
然而人知愛而不忍食鷺忍食而不知愛愛之與食情  
同而好異也亦物之反常有以招其尤而誨其食也豈

特魚爾惟花木之反常者亦然惟人之反常眩世者亦然為金鯉說

雉說

養一雉馴甚次年又買一雉意其共類同籠貯之後雉俱棲若有恐懼色若知先後次序略不敢鬪敵頻首下氣聽命而已先雉昂藏自若頡頏恣傲有驕矜色有凌忽狀予竊怪之不旬日先雉碎面折翅去死無幾後雉洋洋有德色疑莫已敵者余然後知其懼也乃所以藏



怒蓄怨也其退也乃所以求勝也雉耿介禽也不能柔  
弱者也今若此若奴僕之私為計者也若賓客之相驅  
逐者也若同列之生傾忌者也不然則兵法所謂必姑  
與之之術也其蔡澤之攘穰侯者也其蘇秦之取相六  
國者也其張儀破蘇秦之縱者也吾於是乎有感作雉  
說

梅說

梅貴清瘦不貴敷腴雪後園林水邊籬落似全其真若

處之名園上苑對之急管繁絃是四皓之去商山夷齊  
之入瑤室矣古今賦之者何啻數千篇起於宋之鮑參  
軍備於我朝之林處士近世洮湖陳希顏盡和古今梅  
詩計三十六卷亦情鍾之甚者然世之詩愈多而和亦  
多情益多而梅亦益多也曰紅曰白曰蠟曰香曰桃曰  
杏曰綠萼曰鵲黃曰紛紅曰雪頰曰千葉曰照水曰鴛  
鴦者凡數十品不知參軍處士之所詠果何品耶荔枝  
有譜牡丹亦有譜梅獨無譜乎予欲集之而梅與菊近

世亦有譜矣尚何譜之云乎哉姑為之說

水僊說

予酷愛水僊花以金華僊伯所賦八句櫟括作浣沙溪  
詞云水上輕盈步月明凌波僊子韞生塵是誰招此斷  
腸魂種作寒花愁絕意含香艷素欲傾城並芳難弟與  
難兄對花把酒歌之無斁此花最難種多不著花惟建  
陽園戶植之得宜若葱若薤綿亘疇陌含香艷素想其  
風味恨不醉卧花邊昨令健步買百十叢而來空手以

返再三詰責但云有金琰銀臺而無水僊花其欺侮固不在言然政憚於貴攀姑藉為辭耳殊不知水僊花即世人所謂金琰銀臺者是也俗子敗思每每如斯世事欺凌比比皆是豈獨水僊花筆之說似佳客

鄭花說

鄭花染家取其木葉燒灰壓色若礬之能收色也山谷名之山礬能言其用矣荆公以其花白比玉謂之瑤花能言其體矣至其香韻後當有合體用而言其合者故

唐人詩云一樹瓏璵玉刻成飄廊點地色輕輕女冠夜  
覓香來處唯見堦前碎月明若謂此花為玉蘂則此花  
不與此詩稱予遊京口招隱山時見一大藤盤互高架  
僧言是玉蘂花亭上題詠富夥惜乎遊之日乃重九節  
不及見其花若以文饒詩攷之則又不同所謂玉蘂天  
中樹金鑾昔共窺決非藤矣而禁林嘉花珍木尚不暇  
顧問何為植此野樹山簷於彼時豈得別無佳名也哉  
山間冬來野卉萌突香其花玉其色者數種豈獨山簷

是則皆可謂之玉藥矣一經品題便作佳士誠有幸不幸者

瓊花說

瓊花在蕃釐觀中寔舊經行維揚值花方盛為止宿焉人謂若聚八僊者是耳有聞而目未之見也此花大如盤旁遶雙白圓片或八或十多至十二中擁碎花圓潔簇萃香婉色瑩非聚八僊玉蝴蝶可伯仲但記花者云渡江初敵騎徙移去矣今茲再盛不知自何得本花記

又言當日尚留小根踰年重發若有神護此又妄也不  
然何不護之於未徙之前乎時人好奇揚此抑彼立為  
無雙之說每每誇世今閩中士大夫家此種亦多予嘗  
用脫果法自后土祠移本來歸與諸公所植無

闕

非一本也但瓊字若如元獻晏公引文選注以瓊為  
赤玉謂殊不相類而蔡寬夫詩話載王元之始易玉藥為  
瓊花若然則詳一樹瓏璵玉刻成之詩非為山礬設也  
言亦有理尚俟博物者詳之

愛說

建亭兩載而未名嘉定十年七月二十有四日獨坐其上思索無與是亭稱者將歸焉歸而復止焉坐踰時風鳴松竹蕭騷有韻聽之不足睨而視之又踰時若有得焉曰我得其說矣將揭以雲濤雲濤謂松也詩云雲影亂鋪地濤聲寒在空曰於松得矣如竹何不若揭之以淨香淨香謂竹也詩云雨洗娟娟淨風吹細細香曰於竹得矣松其謂我何然則棄竹取松竹將怨我退松進



竹松無怨耶於是兩全之曰讀書取讀書松竹林之句也繼自念言予築居此山有書室又有書樓養浩有堂願真有館胡不紬繹經史必游玩一亭然後可以讀古人之書耶不覺抵掌大笑拂衣竟起俯顧山石數拳發竒獻技予不忍去曰石其不可愛歟竒章公之所嗜者予亦嗜之當以愛石名自謂得其似矣於石宜矣於亭稱矣進撫是石見植者蒼者叢者秀者挺而立者直而勁者無不可愛立而思之趨而就之走而摩拊之遠而

盤桓之是誠足以為愛者子猷愛竹檻有竹焉元亮愛菊籬有菊焉隱居愛松山有松焉君復愛梅亭有梅焉茂實愛蓮池有蓮焉屈原愛蘭砌有蘭焉僧儒愛石山有石焉禦寇愛泉川有泉焉夫以數弓之地而古之人愛者萃聚無遺古人得其一亦足以樂其生我今兼之是天與也地與也造物與也總其與而受之合其愛而名之使來者知我之愛者愛其所愛而不愛其所不愛也勢要也爵祿也卿相也富貴利達也其可愛乎作愛

說

哨遍

長橋天下絕景也松江太湖舉目千里風濤不  
作水面砥平歸颿征棹相望於黃蘆煙草之際  
去來乎橋之左右者若非人世極畫工之巧所  
莫能形容每來維舟未嘗即去徜徉延佇意盡  
然後行至欲作數語以狀風景勝槩辭不意逮  
筆隨句閣良可慨嘆己未冬自雲陽歸閩臘月

望後一日漏下一鼓檣舟橋西披衣登垂虹時  
夜將半雪月交輝水天一色顧影長嘯不知此  
身之寄於旅返而登舟謂偕行者周生曰佳哉  
斯景也詎可無樂乎於是相與破霜蟹斫細鱗  
持兩螯舉大白歌赤壁之賦酒酣樂甚周生請  
曰今日之事安可無一言以識之予曰然遂隱  
括坡僊之語為哨遍一闋詞成而歌之生笑曰  
以公之才豈不能自寓意數語而乃綴緝古人

之辭章得不為名文疵乎余曰不然昔坡僊蓋  
嘗以靖節之詞寄聲乎此曲矣人莫有非之者  
予雖不敏不敢自亞於昔人然捧心効顰不自  
知醜蓋有之矣而寓意於言之所樂則雖賢不  
肖抑何異哉今取其言之足以寄吾意者而為  
之歌知所以自樂耳子何哂焉

木葉盡凋湖色接天雪月明江水凌萬頃一葦縱所之  
若憑虛馭風僊子聽洞簫綿延不絕如縷餘音嫋嫋遊

絲曳迺舉酒賦詩王鱗霜蟹是中風味偏美任滿頭堆  
絮雪花飛更月澹蓬窻凍雲垂山鬱蒼蒼槁卧沉沉夜  
鵲驚起凍噫倚蘭漿兮我今恍惚遺身世漁樵甘放浪  
蜉蝣然寄天地嘆富貴何時功名浪語人生寓樂雖情  
爾知逝者如斯盈虛如彼則知變者如是且物生宇宙  
各有司非已有纖毫莫得之委吾心耳目所寄用之而  
不竭取則不吾禁自色自聲本非有意望東來孤鶴縞  
其衣袂乘之從此僊矣

蝶戀花

北津  
夜雪

燈火已收正月半一夜東風吹得寒威轉怪得美人貪  
睡暖飛瑛積玉千林變睡道是柳綿春尚淺比着梅花  
花已都零亂漠漠一天迷望眼多情更把征衣點

賀新郎

代黃  
端夫

白牡丹京師妓李師師也畫者曲盡其妙輸棋  
者賦之

午睡鶯驚起鬢雲偏鬢鬆未整鳳釵斜墜宿酒殘粧無

意緒春恨春愁似水誰共說厭厭情味手展流蕪腰肢  
瘦嘆黃金兩鈿香消臂心事遠仗誰寄 簾櫳漸是槐  
風細對梧桐清陰滿院夏初天氣回首春空梨花夢屈  
指從頭暗記嘆薄倖拋人容易目斷孤鴻沉雙鯉恨蕭  
郎不寄相思字幽恨積黛眉翠

憶王孫

清明  
病酒

淑景韶光晴晝簾外雨欲無還有流鶯枝上轉新聲夢  
初醒厭厭病酒 天連碧草凝情久思舊事不堪搔首



懷人有恨水雲深  
又綠暗橋西柳

戀繡衾

閨怨

柳絮風翻高下飛  
雨籠晴香徑尚泥  
女伴笑踏青好鳳  
釵偏花壓鬢垂  
亂鶯雙燕春情緒  
攪愁心欲訴向誰  
人問道因誰瘦  
撚青梅閒斂黛眉

惜分飛

柳絮

池上樓臺堤上路  
盡日悠揚飛舞  
欲下還重舉  
又隨蝴蝶墻東去  
糝逕飄空無定處  
來往綠窻朱戶  
却被春

風妬送將蛛網留連住

浣溪沙

木犀

天上仙人萼綠華何年分種小山家  
九秋風露溢牕紗  
密密翠羅攢玉葉團團黃粟刻金花  
一枝歸插鬢雲斜

賀新郎

近聞敵國式微諸公未有勸上修飭內治以待  
攘者書生感憤不能已用辛稼軒金縷詞韻述

懷此詞蓋鷺鷥林寄陳同父者韻險甚稼軒自  
和凡三篇語意俱到捧心效顰輒不自揆同志  
母以其迂而廢其言

往事何堪說念人生消磨寒暑謾營裘葛少日功名頻  
看鏡綠鬢鬢髻未雪漸老矣愁生華髮國恥家讎何年  
報痛傷神遙望關河月悲憤積付湘瑟人心未可隨  
時別守忠誠不替天意自能符合誤國諸人今何在回  
首怨深次骨歎南北久成離絕中夜聞雞狂起舞袖青

萍蔓擊光磨鐵三太息皆空裂

同前

再韻  
賦梅

東閣憑詩說對丰姿飄然杖屨澹然巾葛竹外一枝斜  
更好玉質冰肌粲雪誰折向滿頭宣髮水驛雲窻烟庭  
院更宜晴宜雨還宜月霜夜永景蕭瑟孤芳覓與羣

芳別隴程遙攀條難寄碧雲驚合桃李漫山空春艷不  
比仙風道骨有瀟灑清新奇絕我被幽香相懊惱宋廣  
平豈但心如鐵飛暗度石吹裂

東坡梅詩昨夜東風吹  
石裂暗隨飛雪度關山

同前

再韻  
賦雪

曉聽兒曹說道前村疎梅莫與蔽蕭纏  
葛急與呼童誅剪盡趁此江天暮雪喚小艇  
漁翁鶴髮凜冽寒風吹酒面與何人共泛  
山陰月歸浩歎御琴瑟世寰恍惚山川別  
望瓊樓玉宇相映爛銀環合冰柱雪車新  
句就不療饑腸病骨奈野鳥千山飛絕我  
笑書生貧亦甚誦布衾歲久寒如鐵兒惡  
卧踏裏裂

滿江紅  
避暑

午轉槐陰正炎暑侵肌似醉問何處披襟散髮解衣揚  
袂傍沼茅亭楊柳綠倚崖草閣梧桐翠喚玉人纖手掬  
清泉生涼意開枕簟浮瓜芡瓊液淺歌喉細對文禽  
雪鷺助成幽致十頃碧蓮瀟灑國萬竿修竹清涼世筭  
此時情緒有誰同吾儂自

同前

雙頭蓮

一柄雙花低翠蓋呈祥現美人正在薰風亭上滿襟如  
水二陸比方誇俊少兩喬相並修容止雨初晴午永鬪

紅酣真奇耳 雙白鷺雙鰭飛與泳俱來此綰雙鬟  
天上侍香童子雙劍豐城雙孕秀雙鳧鄴縣雙趨起謾  
空談國士本無雙今雙矣

沁園春 嘆世

浮利虛名算來何用蝸角蠅頭笑勞生一夢兩輪催逼  
脆如朝露輕若春漚有限精神無窮世路劫劫忙忙誰  
肯休堪驚嘆嘆癡人未悟終日營求 百年光景雲浮  
把氣馬心猿須早收有真僊秘訣飡霞導引丹砂鉛汞

早與身謀閒是閒非他強我弱一任從教風馬牛還知道上蓬萊穩路入表神遊

念奴嬌

次韻范正之柳絮

水軒沙岸午風輕飄動一天晴雪日色晶熒光眩眼細  
逐遊絲明滅簾幕中間樓臺側畔渾是瑤瑛積綴松黏  
竹恍然如對三絕遙認髻髻飛花花非還似惱亂多情  
客點染春衫無定處又轉沉香亭北密密疎疎斜斜  
整整似雪難分別坡僊不見後人有口何說



同前 次韻

斷虹開霽淨秋容  
點點初收微雨夕  
下生陰山影澹縹  
緲烟雲吞吐烏帽  
風偏青鞵沙軟誤  
入桃谿塢多情鷗  
鷺偶來忽又飛去  
日暮修竹佳人霧  
綃瓊佩綽約疑  
僊侶愧我禪心春  
盡絮不逐東風飛  
舞紅葉題詩紫雲  
傳恨密意渠能訴  
此情疎隔不闕樓  
外烟樹

菩薩蠻

暮濤掀浪溪流急  
單衣未試春寒力  
是處綠陰穠春深

楊柳風 人依溪岸住酒美忘歸去巢燕墮芹泥幽禽  
花外啼

同前

鴉兒學盡猶嫌醜佯羞步步隨嫌後春淺瘦花枝凝愁  
為阿誰 那回筵畔見有意相留戀只恐後期愆章臺  
飛柳綿

鷓鴣天

賦雪

樓外銀屏入望賒樓前鷗鷺舞交加穿林淅瀝飛瓊屑

度嶂繽紛過柳花  
歌白雪醉流霞  
晚寒寒似夜來些  
明朝酒醒掀簾幕  
簾幕依然賣酒家

西江月

世事從來無據  
人生自古難憑  
茫如天水有雲萍聚散  
任他形影  
每恠東陽瘦損  
常嗤騎省多情  
如今我也  
瘦稜稜却喜青青兩鬢

水調歌頭

飲垂虹

三載役京口  
十度過松江  
垂虹亭下烟水長  
是暎蓬窓

釣得錦鱗成鱸快把霜螯浩飲豪氣未能降醉舞影零  
亂心逐浪春撞景蒼茫歌欵乃石空磴蕪葭深處適  
意魚鳥自雙雙便擬輕舟短棹明月清風長共與世絕  
紛囘嘉遯有真隱不羨鹿門龐

醉落魄

用范石湖韻

江頭離席晚潮雙櫓催行色往來屬玉雙飛白笑我多  
情猶作未歸客紅塵奔走何時息歸心還似投林翼  
角巾醉裏從歌側獨立東風天際露岑碧

長相思

西湖  
夜醉

湖山橫湖水平買箇湖船一葉輕  
傍湖隨柳行  
秋風清秋月明誰搥秋砧烟外聲  
悲秋無盡情

鷓鴣天

發舟安  
康朋遊見  
留往復三  
月蜀

芳草萋萋入眼濃  
一年花事又怱怱  
吐舒桃臉今朝雨  
雲落梅粧昨夜風  
雲接野水連空  
畫欄十二倚誰同  
兩眉新恨無分付  
獨立蒼苔數落紅

同前

夢遶天涯去意濃  
客愁春恨兩怱怱  
綠波初漲桃花浪  
畫鷁輕隨柳絮風  
無筆力判虛空  
關山千里兩心同  
魚書鴈字都休問  
只有啼痕翠袖紅

同前

山色都如歸興濃  
春融融處客怱怱  
岸花影裏鶯吟霧  
江閣陰中燕受風  
凭畫檻睇層空  
情衷待說幾時同  
不如且盡尊中綠  
圖得醺醺醉臉紅

菩薩蠻

杏花

昨日杏花春滿樹，今晨雨過香填路。  
零落軟胭脂，濕紅無力飛。  
轉頭春易去，春色歸何處？  
待密與春期，春歸人也歸。

浣溪沙

送連景昭歸三山

來日江頭柳帶香，去時籬下菊花黃。  
人生離別幾淒涼，拂面紅塵飛冉冉，  
背人白日去堂堂。  
尺書休負鴈南翔。

眼兒媚

十年不見柳腰肢  
契濶幾何時  
天遙地遠  
秋悲春恨  
只在雙眉  
鴈聲今夜樓西畔  
情悵眇難期  
杏花風景  
梧桐夜月  
都是相思

桃源憶故人

暮霞散綺  
西溪浦  
天上晴雲開  
絮清絕  
梅花幾樹  
惱亂春愁處  
小橋流水人來處  
沙岸浴鷗飛鷺  
誰畫江南好處  
著我閒中屨

糖多令

登多景樓



何處浣離憂消除許大愁望長江滾滾東流一去鄉關  
能幾日纔屈指又中秋蘆葉滿汀洲沙礫小艇收醉  
歸來明月江樓欲把情懷輸寫盡終不似少年遊

小重山

春水東流一葦杭春情剪不斷漢江長江花江草為誰  
芳渾不似沙暖睡鴛鴦且道不思量怕他知得後痛  
肝腸路遙天濶水茫茫成病也教我怎禁當

行香子

鄱陽  
食魚

雪白肥鰱墨黑修鮎柳穿腮小大相兼金刀批鱖鮮活  
甘甜或時燒或時煮或時醃 揎腕佳人玉手纖纖縷  
銀絲取意無厭羹須澹煮滋味重添滴兒醢呷兒酒撮  
兒鹽

臨江僊

富池  
岸下

人在空江烟浪裏葉舟輕似浮漚此心無怨也無憂漢  
江迷望眼衮衮直東流 兩岸荻蘆青不斷四山岡嶺  
綢繆晚風吹袂冷颼颼誰知三伏暑全似菊花秋

漁家傲

白湖觀  
捕魚

漢水悠悠還蕩漾  
漁翁出沒穿風浪  
千尺絲綸垂兩漿  
收又放  
月明長在烟波上  
釣得活鱗鱖  
縮項筍成玉液  
香浮盞  
醉倒自歌歌自唱  
輕艤舫  
碧蘆紅蓼清灘傍

菩薩蠻

鄂渚  
岸下

烟汀一抹蘼葭渚  
風亭雨下荷花浦  
月色漾波浮  
波流月自留  
若耶溪上女  
兩兩三三去  
眉黛斂羞娥  
採菱隨擢歌

烏夜啼

夜泊揚子江

長亭急管生愁楚  
天秋落日寒鴉飛盡水悠悠  
紅蓼

岸白蘋洲浴輕鷗  
人在碧雲深處倚高樓

虞美人

寒來暑往何時了  
世故催人老  
一口揷幾張匙何用  
波波却却沒休時  
饑來喫飯困來睡  
莫把身為累  
誰能較短與量長  
落葉西風一夢熟黃梁

賀新郎

送鄭材卿

莫向愁人說嘆人生不如意事十常七八是則中年傷  
懷挹客裏何堪送客又添取一襟悽咽岸柳凋零秋容  
澹黯銷凝怎忍輕攀折重會面甚時節 杏花麗日梅  
花雪記當時一觴一詠楚雲湘月別後君休勞遠夢轉  
眼江南塞北莫謾被閒愁縈結且判離筵今夕醉霎  
時間便見蘭舟發空悵望水雲濶

方是閒居士小稿卷下

方是閒居士小稿跋

疇昔之日柳與先生把酒論文揮金結客慨然有志天下之事功是所謂交遊者也今之日先生浩然之氣充塞宇宙學問文章出處議論與古人齊驅並駕而柳學日益荒文日益退所養之氣且又休於時而不能屈伸蓋今吾非故吾矣吁可嘆哉謂之交遊可乎不可也是當以師事之先生英雄人也號種春子而隱於耕莘野渭濱其同者歟豈真隱哉少需時耳暇日發為詩文游

戲翰墨亦豈徒云乎哉識者當自知之此集二百餘篇  
凡三萬言邴親授先生之前而手編之朝而誦暮而誦  
歸而語諸同志曰我得師矣行者遇焉先生以為然乎  
幸終教之季秋中泠學生游邴書

世興之友吳介父一日出諸公所賦專壑七詠數巨軸  
謂世興曰仁夫屢見此詩矣君詩人也幸毋泛觀之世  
興領其誠旬餘始得之其間獨方是閒劉公傑出衆作  
展觀敬誦愈誦愈高如太羹元酒具有真味恨不多見



之季僊近自立夫還會晤之初未暇他語首出公詩文  
世興始得縱觀熟讀愈多愈竒又恨其前者未瞻際之  
季僊旦夕又從公遊世興又恨以係小子失丈夫不得  
偕之詩云未見君子憂心忡忡既見君子我心則降季  
僊幸為我誦此詩以道意季秋二十五日石溪癯翁周  
世興仁夫書

季僊臨行復出此集如畫壁賦一枝堂記等六十餘篇  
皆不在詩軸中文章公器季僊珍而不盡以示諸朋友

意果何在焉得此集遍傳人間俾學者知所宗季僊不得而私有之後一日周世興再書

真金良玉自有定價文章亦猶是也炳久矣聞方是閒丈盛名惜未識之介觀其文章詞翰飄逸粹韻益坡僊復在人間矣季僊平時馳騁文筆應自知之不然安肯甘拜下風而事之以師雖然師友之間又當求之於心不必求之於迹作文之法季僊其得師之心乎季僊能文其必有得於師之心矣炳過言之幸毋誚二十七日

誠山丁炳文叔書

方是閒先生廼屏山先生之的孫其文章高爽詞意閒雅真可追配前作豈非所謂海之支流必鹹玉之棄屑必潤者耶然先生生平志四方足跡半九州其胸中名山大川收覽之富凡所以發越其性情膏潤其筆端者又非必有所繇而後有所詣也日錄詩稿至多今季僂兄所受特其緒餘嘗鼎一臠旨可知矣下澣日門士劉友直伯益書

淳納交於方是閒丈垂二十年矣觀其文辭玩味心服起敬起歎疇昔之日益未嘗傳示於人也季僊此來未踰旬日慨然屈軀衣之禮手抄一集歸以示諸朋友季僊之心公而且明淳所不逮然季僊之明惟知師之文章典雅至於師之致知格物以及於絜矩之道季僊則未之知也季僊未知而予何以知之蓋公暇日與淳共論性理之學且曰絜者度也當以斯義為正然後知公之學以己之能而絜古人之所能斯文之作理與心契

自合大方故香山之詩坡僊之文今古相望如出一手  
者是皆絜矩中來也今季僊師事之固為得師矣然致  
知格物之學季僊所未聞者又將次第而聞之孟冬一  
日演平黃淳端夫書

方是閒先生立視之丈人行也少日和諸公梅詩有清  
香貫鼻風傳信瘦影橫窗月寫真之句先君子嘗切歎  
賞而文公亦云壓倒座客歸廼以語立輩曰此實未經  
人語者迴出諸昆之右作者所不及異時必成名於當

世然已為文公及先君稱賞如此今文公下世十有七年而先君下世亦二十年矣而先生之文日進火然泉達駸駸不已平居暇日酌唱吟咏聯篇累軸積而成集者富甚今游兄學詩於先生先生揭出詩文二百餘篇以授之游兄將欲刊行諸公收置惟恐或後惜乎文公與先君俱不及見之先生雖不汲汲於仕進但抱負如是豈林泉所能久羈者耶殆將見諸事業擢辭玉堂待詔金馬作為文章以歌誦朝家之盛德當與殷頌周雅

爭輝並美傳之後世又豈此而已哉東里先生溪翁劉  
又皆先君之友當世之詩人也今軍行與先生遊且為  
叙以冠其首刻梓有日立雖不肖敢書其末以表先君  
子之知言云莆陽方立謹跋

白也詩無敵飄然思不羣此少陵詩也李杜文章在光  
焰萬丈長此昌黎詩也元微之白樂天之互相推明歐  
陽公梅聖俞之遞相許可豈有他哉蓋惟己之高則足  
以窺人之高使我胸中之造化不足焉能發人之巧耶

方是閒先生種德家庭天姿秀發沉浸醲郁溢為詩文  
卅年賦梅花晦菴先生見而奇之其日暇月煉益久益  
工敬觀是集所錄愈讀而愈不厭趙東里以下諸公皆  
嘗斲曹劉之壘拍李杜之肩者一見擊節而序之質之  
古人無間然矣牧不能詩敢以私意評品追誦先生之  
言載味諸公之序書數語於後不失為寄人籬落之下  
幸毋哂焉枯山張牧書

洛陽少年論事不合一旦謫去弔湘賦鵬皆悲傷怨懟



之辭君子許其才而不許其學至杜陵野老饑寒流落  
一詩一詠未嘗忘君天下後世謂之詩史其以此耶大  
丈夫不負所學不得自見於斯世則已何至於怨乎方  
是閒居士忠顯聞孫西樞猶子機雲阿咸青紫滿家居  
士合得一官而乃廉靜退託毅然有隱約之志脫軒冕  
而就薜蘿去廊廟而履巖壑此政與洗耳采薇謝故人  
釣富春者同量孔子曰不怨天不尤人居士得之矣以  
莊自登屏山之門見居士於總角風韻豪爽有超軼絕

塵凌厲宇宙之氣其後遊襄漢經蜀都寄湖湘歷覽名山大川取友於天下自六經諸子史傳百家之書與夫天文地理識緯之學古今文集典故之文歷世醫藥方技異書奇字莫不研究所以其文富贍淵源其詩雄麗清壯如長江大河波瀾起伏有優游自得之趣而無慘戚無聊之意有疎曠自放之志而無怨怒不平之態方且浚流為池疊石作山藝花行柳紉蘭賦梅種春釀泉酌客終日清談不倦多識前言往行聽者聳然真有先

世古君子之風其視功名利祿為何等物尚何怨乎雖然抱負所學如此豈終窮者朝家旌忠褒節訪其子孫之賢而錄用之必有任其責者然於居士何所加損焉以莊於居士既親且契遊從甚久知之深悉其心姑叙其風槩如此若夫品題之言猶在耳則有文公遠菴於前序詩以名世傳遠則有東里溪翁於後使覽者有攷焉方外士陳以莊敬叟書

季僊翫侮一世學恃家博才恃天稟擗堯占辭娓娓數

百言不倦雖古作者復生不肯少辟其席而况北面乎  
人今乃北面於方是閒居士者豈居士勢以壓之氣以  
勝之耶且居士之文予非角得而讀之有以知其薰班  
馬之香摘屈宋之艷人皆服其追並吾知久矣時季僊  
未之服也今摳衣趨隅口誦心惟至於筆之書者非徒  
服也昔沈諸梁之不識孔子陳了翁之不識伯淳俱不  
免見譏於當世季僊之願師母乃責沈之遺意歟幸多  
以酒沃之毋使他時叛道如湜籍輩也叢亭劉璥書

右方是閒居士小稿二集乃從高祖種春公之所述也  
舊已鏤板因燬於兵遂失其本近偶得於邑士家捧誦  
欣喜如獲重寶蓋居士厭珪組之榮樂林壑之勝得以  
從容於文墨間信能振家學而衍遺芳者也今幸其詩  
文猶存其可泯而無傳乎遂復授諸梓非敢必其行世  
庶幾族之子弟得以諷詠想像有所感發而興起則世  
業不墜書脈復續是所望也幸相與勉之時至正二十  
二年歲在辛丑暮春初吉從玄孫張百拜敬書



方是閒居士小稿卷下

方是閒居士小稿自記

游季僊來山中相訪索予詩文不寘口辭拒不能為檢  
尋舊唱和獨出一百首新作七十一首雜著二十七首  
詞四十一首集成兩編以酌其雅志予語塵俗不足道  
季僊先世文學彰彰在人口而季僊伯仲詞翰又皆稱  
於朋儕今棄彼取此豈厭膏粱而思藜糗忘黃鐘而取  
瓦缶者乎因書其後而歸之嘉定丁丑重陽後十日種  
春子劉學箕習之父書於方是閒堂

